

昌平山水記

昌平山水記卷上

崑山顧炎武寧人著

京師九門其西北曰德勝門元之健德門也洪武元年九月大將軍徐達改今名

出門八里爲土城元舊也正統十四年十月己未也先奉上皇車駕登土城以通政司左參議王復爲右通政中書舍人趙榮爲太常寺少卿出見上皇於土城即此地也

又二十里爲清河其水出玉泉山分流而北逕此又東會於沙河入於白河元順帝至正二十四年禿堅帖木兒以兵向闕駐於清河索右丞相搠思監資正

院使朴不花二人帝不得已執而畀之其兵乃退即此地也有石橋跨其上永樂中建宣德五年二月乙未上奉皇太后謁長陵獻陵上躬橐鞬騎導皇太后輦至清河橋下騎扶輦既度橋上復乘騎郊甸之民夾道羅拜皆稱萬歲

又十二里有元福官宏治十七年建俗呼爲回龍觀又十八里爲沙河店店南有水出昌平州西南五十里龍泉寺合西山諸泉東流爲南沙河有橋曰安濟店北有水出昌平州西南四家莊逕雙塔村東流爲北沙河有橋曰朝宗二橋正統十三年命工部右侍郎王永壽建二水至店東南竇家莊而合又東南至

通州界入白河漢書軍都有濕餘水東至潞南入沽  
即此水也店在二水之間今尚有居民百餘家

先是車駕北征及上陵多駐沙河有文皇帝行宮遺  
址正統時爲水所壞嘉靖十六年三月丁未上駐蹕  
沙河禮部尚書嚴嵩言此爲車駕謁陵之路南北道  
里通均且居庸白羊近在西北邊防尤切宜修復行  
宮築城環之設官戍守從之十七年五月始於沙河  
店之東建行宮十九年正月城之名曰鞏華南北徑  
二里東西徑二里門四南曰拱京制如午門北曰展  
思東曰鎮遼西曰威漢行宮在城之中先以勲臣若  
都督守之二十八年改副總兵後改守備有分守公

署真靖所及營房五百間今圯惟行宮存

又二十里爲昌平州故永安城也正統中調長獻景三陵衛於中東西三山口及東西二營地方駐劄以護陵寢及土木之難明年景泰元年於昌平縣之東八里築城徙衛於內名曰永安三年并昌平縣徙焉今之東西二門及城中大橋故南門遺蹟也其後續設陵衛益多仍於城南復築一城連之今之南門是也乃去舊城南面磚石而合爲一周一十里二十四步州治在舊城內大街西先爲順天府昌平縣正德元年南京吏部尚書林瀚言陵寢所在歲三大祭欽遣百官陪祀及帝后忌辰歲暮正旦竝遣駙馬詣

陵縣小民貧供億煩苦請改爲州以密雲順義懷柔  
三縣隸之助其力役凡有科派差徭及養馬之類悉  
皆優免從之未幾復降爲縣八年縣丞張懷復奏始  
定爲州以密雲順義懷柔三縣屬焉仍隸順天府  
天壽山在州北一十八里永樂五年七月乙卯皇后  
徐氏崩上命禮部尚書趙玘以明地理者廖均卿等  
往擇地得吉於昌平縣東黃土山及車駕臨視封其  
山爲天壽山以七年五月己卯作長陵十一年正月  
成仁孝皇后梓宮自南京至二月丙寅葬二十二年  
七月辛卯上崩于榆木川十二月庚申葬自是列聖  
因之皆兆於長陵之左右而同爲一域焉

自州西門而北六里至陵下有白石坊一座五架又北有石橋三空又二里至大紅門門三道東西二角門門外東西各有碑刻曰官員人等至此下馬入門一里有碑亭重簷四出陞中有穹碑高三丈餘龍頭龜趺題曰大明長陵神功聖德碑仁宗皇帝御製文也亭外四隅有石柱四俱刻交龍環之其東有行宮今止又前可二里爲櫺星門門三道俗名龍鳳門門之前有石人十二四勲臣四文臣四武臣石獸二十四四馬四麒麟四象四橐駝四獬豸四獅子各二立二蹲近者立遠者蹲石柱二刻雲氣竝夾侍神路之旁迤邐而南以接乎碑亭碑文後書洪熙元年四月

十七日小子嗣皇帝某謹述蓋文成而碑未立宣德  
十年四月辛酉修長陵獻陵始置石人石馬等於御  
道東西十月己酉建長陵神功聖德碑是時仁孝皇  
后之葬二十有三年太宗文皇帝之葬亦十有一年  
矣然而始立者重民力也櫺星門北一里半爲山坡  
坡西少南有舊行宮今存土垣一周坡北一里有石  
橋五空又北二百步有大石橋七空大石橋東北一  
里許有新行宮宮有感恩殿今亾宮東南有工部廠  
及內監公署今竝亾大石橋正北二里有石橋五空  
又二里至長陵殿門神道自嘉靖十五年世宗謁陵  
始命以石甃今稍殘缺自大紅門以內蒼松翠栢無

慮數十萬株今翦伐盡矣

長陵在天壽山中峰之下門三道東西二角門門內東神厨五間西神庫五間厨前有碑亭一座南向內有碑龍頭龜趺無字重門三道榜曰祔恩門東西二小角門門內有神帛爐東西各一其上爲享殿榜曰祔恩殿九間重簷中四柱飾以金蓮餘皆髹木階三道中一道爲神路中平外城其平刻爲龍形東西二道皆城有白石欄三層東西皆有級執事所上也兩廡各十五間殿後爲門三道又進爲白石坊一座又進爲石臺其上爐一花瓶燭臺各二皆白石又前爲寶城城下有甬道內爲黃琉璃屏一座旁有級分東

西上折而南是爲明樓重簷四出陞前俯享殿後接  
寶城上有榜曰長陵中有大碑一上書曰大明用篆  
下書曰成祖文皇帝之陵用隸字大徑尺以金填之  
碑用朱漆欄畫雲氣碑頭交龍方趺寶城周圍二里  
城之內下有水溝自殿門左右繚以周垣屬之寶城  
舊有樹今亡

獻陵在天壽山西峰之下距長陵西少北一里自北  
五空橋北三十餘步分西爲獻陵神路至殿門可二  
里有碑亭一座重簷四出陞內有碑龍頭龜趺無字  
亭南有小橋門三道榜曰祔恩門無角門殿五間單  
簷柱皆朱漆直棖階三道其平刻爲雲花石欄一層

東西有級兩廡各五間餘如長陵殿有後門爲短簷  
屬之垣垣有門垣後有土山曰玉案山故闢神路于  
殿西玉案山之石有小橋前數步又一小橋跨溝水  
溝水自陵東來過橋下會於北五空橋山後橋三道  
皆一空又進爲門三道竝如長陵而高廣殺之甬道  
平寶城小冢半填榜曰獻陵碑曰大明仁宗昭皇帝  
之陵餘竝如長陵山之前門及殿山之後門乃寶城  
各爲一周垣舊有樹今亡十二陵制獻陵最樸景陵  
次之洪熙元年五月辛巳上疾大漸遣詔有曰朕臨  
御日淺恩澤未浹於民不忍重勞山陵制度務從儉  
約是日上崩皇太子即皇帝位及營仁宗皇帝山陵

上諭尚書蹇義夏原吉等曰國家以四海之富葬其親豈惜勞費然古之帝王皆從儉制孝子思保其親之體魄於久遠者亦不欲厚葬秦漢之事足爲明鑒況皇考遺詔天下所共知今建山陵予以爲宜遵先志卿等之意如何義等對曰聖見高遠發於孝思誠萬世之利於是命成山侯王通工部尚書黃福總其事其制度皆上所規畫也

景陵在天壽山東峰之下距長陵東少北一里半自北五空橋南數步分東爲景陵神路至殿門三里碑亭門廡如獻陵殿五間重簷階三道其平刻爲龍形殿有後門不屬垣殿後門三道竝如獻陵甬道平竇

城長而狹榜曰景陵碑曰大明宣宗章皇帝之陵周垣如長陵寶城前有樹十五株冢上一株

裕陵在石門山距獻陵西三里自獻陵碑亭前分西爲裕陵神路路有小石橋碑亭北有橋三道皆一空平刻雲花殿無後門榜曰裕陵碑曰大明英宗睿皇帝之陵餘竝如景陵寶城如獻陵垣內及冢上樹一百六七十株

茂陵在聚寶山距裕陵西一里自裕陵碑亭前分西爲茂陵神路路有石橋一空制如裕陵榜曰茂陵碑曰大明憲宗純皇帝之陵垣內外及冢上樹千餘株十二陵惟茂陵獨完他陵或僅存御榻茂陵則奠虞

之屬猶有存者

泰陵在史家山距茂陵西少北二里自茂陵碑亭前分西爲泰陵神路路有石橋五空賢莊灰嶺二水逕焉碑亭北有橋三道皆一空制如茂陵榜曰泰陵碑曰大明孝宗敬皇帝之陵垣內及冢上樹百餘株殿上存御座御案御榻各一承塵皆五色花板多殘缺而茂陵泰陵完焉

康陵在金嶺山距泰陵西南二里自泰陵橋下分西南爲康陵神路山勢至此折而南故康陵東向路有石橋五空錐石口水逕焉今圯又前有石橋三空制如泰陵榜曰康陵碑曰大明武宗毅皇帝之陵明樓

爲賊所焚垣內外樹二三百株

永陵在十八道嶺嘉靖十五年改名爲陽翠嶺距長陵東南三里自七空橋北百餘步分東爲永陵神路長三里有石橋一空有碑亭一座如獻陵而崇鉅過之碑亭南有石橋三道皆一空門二道門內東神厨五間西神庫五間重門三道東西二小角門又進復有重門三道餘以石欄累級而上方至中墀殿七間兩廡各九間其平刻左龍右鳳石欄二層餘悉如長陵殿後有門兩旁有垣垣各有門明樓無甬道東西爲白石門曲折而上樓之三面皆爲城堞榜曰水陵碑曰大明世宗肅皇帝之陵享殿明樓皆以文石爲

砌壯麗精緻孝長二陵不及也寶城前東西垣各爲一門門外爲東西長街而設重垣於外垣凡三周皆屬之寶城其規制特大云舊有樹今亡

昭陵在文峪山距長陵西南四里自七空橋北二百許步分西爲昭陵神路長四里路有石橋五空德勝口水逕焉又西有石橋一空今圯陵東向碑亭西有橋三道皆一空餘如康陵榜曰昭陵碑曰大明穆宗莊皇帝之陵明樓爲賊所焚樹亡

定陵在大峪山距昭陵北一里自昭陵五空橋東二百步分北爲定陵神路長三里路有石橋三空陵東向碑亭東有橋三道皆一空制如永陵其不同者門

內神厨庫各三間兩廡各十間三重門旁各有牆牆有門不升降中門之級殿後有石欄一層而寶城從左右上榜曰定陵碑曰大明神宗顯皇帝之陵殿廡門爲賊所焚樹止

慶陵在天壽山西峰之右距獻陵西少北一里自裕陵神路小石橋下分東北爲慶陵神路長二十餘步有橋一道一空制如獻陵平刻龍鳳殿柱飾以金蓮殿無後門殿後繚以垣門一道門北有橋三道皆一空其水自殿西下殿門西又有一小橋爲行者所繇殿北過橋有土岡自東而來至神路而止岡後周垣門三道如獻陵寶城東西直上至中復爲甬道而入

榜曰慶陵碑曰大明光宗貞皇帝之陵殿門前及垣內樹四五百株

德陵在檀子峪距永陵東北一里自永陵碑亭前分北爲德陵神路陵西南向碑亭前有橋三道皆一空制如景陵平刻龍鳳殿柱飾以金蓮殿無後門榜曰德陵碑曰大明熹宗哲皇帝之陵樹以凡殿樓門亭俱黃瓦

十一陵皆一帝一后合葬有繼立爲后而祔葬者有追尊所生爲后而祔葬者仁孝文皇后徐氏葬長陵誠孝昭皇后張氏葬獻陵孝恭章皇后孫氏葬景陵孝莊睿皇后錢氏葬裕陵孝貞純皇后王氏葬茂陵

孝康敬皇后張氏葬秦陵孝靜毅皇后夏氏葬康陵  
孝潔肅皇后陳氏葬永陵孝懿莊皇后李氏葬昭陵  
孝端顯皇后王氏葬定陵孝元貞皇后郭氏葬慶陵  
孝烈皇后方氏祔葬永陵孝安皇后陳氏祔葬昭陵  
繼后也孝肅皇后周氏祔葬裕陵憲宗母也孝穆皇  
后紀氏孝惠皇后邵氏祔葬茂陵孝宗母睿宗母也  
孝恪皇后杜氏祔葬永陵穆宗母也孝定皇后李氏  
祔葬昭陵神宗母也孝靖皇后王氏祔葬定陵光宗  
母也孝和皇后王氏孝純皇后劉氏祔葬慶陵熹宗  
母大行皇帝母也而熹廟懿安皇后張氏不知所終  
事莫得而詳焉

宮人從葬之令至英宗始除故長陵有東西二井東井在德陵東南饅頭山之南西向西井在定陵西北東向竝重門門三道殿三間兩廡各三間綠瓦周垣會典言長陵十六妃從葬位號不具其曰井者蓋不隧道而直下故謂之井爾或言越絕書有禹井井者法也禹葬以法度不煩人衆當日命名之意豈有取於此與自英宗既止宮人從葬於是妃墓始名或在陵山之內或在他山其在陵山內者則自昭陵之左九龍池上南行二里許爲蘇山有萬貴妃之墓憲宗妃也制如二井東向又南爲銀錢山有鄭貴妃暨二李劉周四妃之墓神宗妃也制如二井南向今毀又

南爲襖兒峪有四妃二太子墓中閭妃王妃左馬妃次左冲哀太子右楊妃次右莊敬太子世宗妃太子也又南爲悼陵制如二井東南向孝潔皇后陳氏初謚悼靈葬此世宗崩遷永陵而其封兆尚存旁有沈文廬三妃之葬至今猶曰悼陵云有神宮監

悼陵之東爲鹿馬山有田貴妃之墓大行皇帝妃也大行皇帝御宇之日未卜山陵田妃薨葬此在悼陵之下南距西山口一里餘遣工部左侍郎陳必謙等營建未畢而都城失守賊以大行皇帝大行皇后周氏梓宮至昌平州之士民率錢募夫葬之田妃墓內後田妃於右帝居中后居左以田妃之梓爲帝梓斬

蓬藿而封之後乃建碑亭前後各一座門三道殿三間無陛兩廡各三間有周垣而規制狹小曾不及東西井之閔淡昔宋之南渡會稽諸陵皆曰櫝宮實陵而名不以陵春秋之法君弑賊不討不書葬實葬而名未葬今之言陵者名也未葬者實也實未葬而名葬臣子之義所不敢出也故從其實而書之也門外右爲司禮監太監王承恩墓以從死附焉

□恭讓章皇后胡氏別葬金山門三道二重殿五間兩廡周垣碑無字恭仁康定景皇帝貞惠安和景皇后江氏別葬金山門三道三重殿五間周垣門內有碑亭一座碑曰大明恭仁康定景皇帝之陵世宗神

宗皆嘗謁焉其妃嬪太子諸王公主之葬西山者以百數自沙河而南三十里紅石口入山陵冢相望皆在京師西直門外三十餘里之內以其不隸於昌平故不載

其隸昌平者則東山口迤東有劉惠妃之墓英宗妃也又東八里綿山有斬獻王膝懷王之墓仁宗子也几陵及妃嬪太子諸王之葬及上所御殿其外垣皆塗以紅

十二陵各有宰牲亭在祔恩門之左西向廳五間廂各三間亭一座有血池外有周垣黃瓦唯長陵止一亭無廳廂而長陵門右別有具服殿五間東向有周

垣垣南有白石槽五方而長名曰雀池貯水以飲雀  
十二陵各有祠祭署在宰牲亭左各有朝房在陵下  
或左或右

十二陵各有神宮監在陵下或左或右有重門廳室  
內臣居之永昭定慶四陵多至三百餘間設內守備  
太監一人神宮監掌印太監十二人

十二陵各有神馬房各有果園其十二榛廠則分置  
在他縣

十一陵各有衛衛各領左右中前後五千戶所主率  
領軍士防護陵寢其公署皆在州城中嘉靖二十九  
年以四千人立永安營三千人立鞏華營無事在州

教塲操演有警赴各隘口把截

凡祭清明中元冬至以太牢國初遣太子親王其後遣大臣行禮文武衙門堂上官各一人屬官各一人分詣陪祭忌辰及聖節正旦孟冬亦遣官行禮止用香燭酒果無帛不陪祭嘉靖十五年改命春以清明秋以霜降遣官行禮各陪祭中元冬至遣官行禮不陪祭歲凡四大祭三小祭云仁宣英武世穆神七宗之朝車駕親謁山陵勲戚文武大臣百司扈從

環山凡十口自大紅門東三里曰中山口又東北六里曰東山口距州東門八里有樓南北二座三層有松園方廣數里皆松檜無一雜木嘉靖中俺答之犯

我兵伏林中竟不得逞而去今盡矣又北而西十里  
曰老君堂口距景陵北二里上有老君堂三間又西  
十五里曰賢莊口距泰陵北五里又西三里曰灰嶺  
口守備一人守之又西南十二里曰錐石口距康陵  
東北二里三口竝有垣有水門崇禎九年昌平之陷  
自此入也又南十二里曰鴈子口距康陵西北三里  
又西南三里曰德勝口距九龍池四里有垣有水門  
又東南十里曰西山口距悼陵南二里有小紅門距  
州西門八里又東二里曰榨子口距大紅門三里凡  
口皆有垣陵後通黃花城自老君堂口至黃花城四  
十里嘉靖十六年三月壬辰命塞天壽山東西通黃

花鎮路口

東山口內一里水中間有小山曰平臺山圓秀成祖嘗駐蹕焉嘉靖十五年上命作亭于上名曰聖蹟十七年四月壬子上幸平臺山祀成祖文皇帝於亭中亭形圓以白石爲欄盤旋數十級而上御題聖蹟二字今毀當口一小山曰影山

東山口內北三四里有蟒山

中山口北一里有仙人洞洞在山麓可容二百許人洞口向東從石梯而下石皆倒垂奇怪下爲平地洞內西北有一門皆石槎牙而成近門上有一大石鐘下懸長數尺門之內少入轉而南見有石罅如夾道

中溪黑不敢入

西山口西四里有虎峪山又三里有大虎峪山

德勝口西三里有溝溝巖有上中下三巖土人呼爲  
石梯溪險可避兵

其水則一自老君堂來逕長陵前而西又東至七空  
橋一自灰嶺口一自賢莊口合而下泰陵橋一自錐  
石口下康陵橋至泰陵橋南數十步而合下定陵橋  
東至七空橋一自德勝口來逕昭陵橋東下七空橋  
總爲一流出東山口至鞏華城東北入沙河而九龍  
池在昭陵西南于山崖下鑿石爲龍頭泉出其吻瀦  
而爲池上有粹澤亭中一間旁各三間門二道東向

繚以周垣爲車駕謁陵事畢臨幸之所嘉靖十五年世宗所勅建也峭壁清流茂林幽館今存者惟垣壁而已

老君堂東北有長春亭三間東西廂各三間以備游憩

陵故爲康家莊長陵之東百餘步有土一邱康老葬焉康老者國初以前人也文皇帝卜斯地而作山陵也曰安死者人之同情也命勿去

而東山口內二里景陵果園之旁有古槐一株其大數十圍中空可容十人坐相傳爲燕山竇氏莊自陵木盡而槐亦伐矣此皆在陵山以內者也

陵西南數十里爲京師西山嘉靖十一年三月勅金山王泉山七岡山紅石山堯山香峪山皆山陵龍脉所在毋得造墳建寺伐石燒灰

州城之內舊有總督兵部侍郎一人整飭兵備山西按察司副使若僉事一人鎮守總兵官一人標下坐營左騎營右騎營左車營右車營遊擊各一人天壽山守備一人戶部郎中若員外若主事一人各有署六部六科翰林院光祿寺以陪祀至者各有館而翰林館在唐劉諫議祠之後諫議名蕡字去華昌平人太和二年舉賢良方正對策指斥宦官遂不第令狐楚在興元牛僧孺在襄陽皆辟爲從事待如師友授

秘書郎爲宦官所嫉誣以罪貶柳州司戶參軍卒昭  
宗時贈右諫議大夫元時以昌平驛官官祺奏請始  
爲之立祠元史泰定二年置諫議書院於昌平縣祀  
唐劉蕡者此也祠本在舊縣縣徙祠亦徙焉在大成  
門之西程敏政詩云新祠門對潁池灣先年翰林諸  
公宿此者無不追往悼今寄情篇什今鞠爲蕪圃矣  
有香帛亭在州治西每祭設黃幄奉安祝版御香于  
此太常寺館焉

州西八里爲昌平舊縣縣名始見於漢齊悼惠王子  
卬以昌平侯立爲膠西王光武時寇恂至昌平襲殺  
邯鄲使者奪其軍耿弇走昌平就其父況盧芳入朝

南及昌平魏文帝拜田豫爲烏桓校尉持節并護鮮卑屯昌平至魏書云軍都縣有昌平城則已廢不爲縣矣章懷太子注漢故城在今幽州昌平縣東南其曰今縣者唐縣今所謂舊縣也東魏天平中復置此縣隋書云昌平縣有關官有長城唐書武德初徙突地稽部落於幽州之昌平城胡三省通鑑注城在軍都關南武后垂拱三年骨咄祿寇昌平即此地元史木華黎傳言師還獵於昌平也速傳言孛羅帖木兒前鋒度居庸關至昌平亦在此景泰三年徙永安城今居民不滿百家而唐狄梁公祠香火特盛歲四月朔賽會二三百里內人至者肩摩踵接考之唐書突

厥陷趙定縱掠而歸公爲行軍副元師獨以兵追之  
不及又爲河北道安撫大使意其嘗至此也有碑一  
元大德四年集賢學士宋渤撰文

又西十里爲龍虎臺地勢高平如臺廣二里袤三里  
元史擴廓帖木兒傳遣部將白鎖住以萬騎衛京師  
駐于龍虎臺與孛羅帖木兒戰是也元時車駕巡幸  
上都往來皆駐蹕其上成祖宣英二宗北征亦駐蹕  
于此永樂八年二月己酉車駕次龍虎臺遣行在太  
常寺少卿朱焯祭居庸山川二十年九月丁巳車駕  
次龍虎臺饗隨駕將校二十一年十二月辛巳車駕  
次龍虎臺賜文武大臣及忠勇王金忠宴宣德五年

十月丁丑車駕次龍虎臺召英國公張輔等至幄中問郊外民事賜酒饌

又西六里爲居庸關南口有城南北二門魏書謂之丁口常景傳都督元譚據居庸下口北齊書謂之夏口文宣紀天保六年築長城自幽州北夏口至恒州九百餘里是也元史謂之南口自南口以上兩山壁立中通一軌凡四十里始得平地而其旁皆重嶺疊嶂蔽虧天日水經注所謂山岫層深側道褊狹曉禽暮獸寒鳴相和羈官游子聆之者莫不傷思者也淮南子云天下九塞居庸其一而金史言中都之有居庸猶秦之崤函蜀之劔門山自太行山迤北至此數

百里不絕自麓至脊皆陡峻不可登中間爲徑者八  
名之曰陁居庸其第八陁也設關于此不知始于何  
代而後漢書建武十五年徙鴈門代上谷三郡民置  
常山居庸關以東元初五年鮮卑入上谷攻居庸關  
則自漢有之矣亦謂之西關三國志田疇乃上西關  
出塞傍北山直趨朔方是也亦謂之軍都關魏書杜  
洛周反於燕州敕都督元譚西至軍都關北從盧龍  
塞據此二險以杜賊出入之路是也亦謂之納款關  
唐書幽州昌平縣西北三十五里有納款關即居庸  
故關通典古居庸關在昌平縣西北齊改爲納款是  
也其南北口之戍則自元始北口千戶所屬上都路

龍慶州南口千戶所屬大都路昌平縣史言睿宗于  
居庸關立南北口屯軍徼巡盜賊各設千戶所至大  
四年樞密院奏居庸關古道四十有三軍吏防守之  
處僅十有三舊置千戶位輕責重於是改千戶所爲  
萬戶府分欽察唐兀貴赤西域左右阿速諸衛軍三  
十人并南北口大和嶺舊隘漢軍六百九十三人屯  
駐東西四十三處立十千戶所置隆鎮上萬戶府以  
統之皇慶元年始改爲隆鎮衛親軍都指揮使司延  
祐二年又以哈兒魯軍千戶所隸焉故此關自古稱  
爲絕險然遼之亾也天祚以勁兵守居庸及金兵臨  
關厓石自崩戍卒壓死不戰而潰金之亾也冶鐵錮

重門布鹿角蒺藜百餘里守以精銳元太祖問計於札八兒對曰從此而北黑樹林中有間道騎行可一人臣嘗過之若勒兵銜枚以出終夕可至太祖乃今札八兒輕騎前導自暮入谷黎明諸軍已在平地疾趨南口金鼓之聲若自天下金人遂潰其後元有天下不及百年而王禪兵入之禿堅帖木兒兵入之孛羅帖木兒兵入之頃者李自成之犯闕也下宣府歷懷來入居庸薄都下曾無藩籬之限地非不險城非不高兵非不多糧非不足也國法不行而人心去也自南口而上兩山之間一水流焉而道出其上十五里爲關城跨水築之有南北二門以參將一人通判

一人掌印指揮一人守之又設巡關御史一人往來  
居庸紫荆二關按視焉有水門宣德三年八月命行  
在工部侍郎許廓修居庸關城及水門者也城之中  
有過街塔臨路北大路累石爲臺如譙樓而窺其下  
以通車馬上有寺名曰泰安正統十二年賜名下窾  
處刻佛像及經有漢字有番字元史泰定三年五月  
遣指揮使兀都蠻鑄西番咒語於居庸關厓石今其  
刻甚多非一時筆而元葛邏祿廼賢詩序言關北五  
里有敕建永明寶相寺宮殿甚壯麗三塔跨於通衢  
車騎皆過其下者今亡其二矣

又八里爲上關有小城南北二門又七里有彈琴峽

水流石罅聲若彈琴上有佛閣又七里爲青龍橋道東有小堡又三里至八達嶺有城南北二門元人所謂北口者是也以守備一人守之

口外地稍平行五里至岔道乃有二路一自懷來衛保安州歷榆河土木雞鳴三驛至宣府爲西路一至延慶州永寧衛四海冶爲北路宣德五年十月戊寅上巡邊駐蹕岔道已卯獵于岔道自南口至岔道皆延慶衛地也自洪武三年徙山後諸州之民於關內而於居庸關立守禦千戶所永樂二年立隆慶衛隆慶左衛十二年始於岔道北二十里立隆慶州州東三十里立永寧縣十三年於岔道西一百二十里立

保安州宣德元年徙隆慶左衛於永寧縣而關獨有隆慶衛隆慶元年改延慶衛領左右中前後五千戶所自八達嶺下視居庸關若建瓴若闢井故昔人謂居庸之險不在關城而在八達嶺而岔道又八達嶺之藩籬元人於北口設兵其得地形之便者與

此山古爲軍都山後漢盧植隱居昌平軍都山中昭烈修弟子禮事之晉段匹磾欲擁其衆徙保上谷阻軍都之險以拒末波魏道武伐燕遣將軍封真等從東道出軍都襲幽州即此山也漢立軍都縣於山之南胡騎經軍都耿舒襲破其衆斬匈奴兩王是也亦作渾都史記絳侯周勃世家屠渾都是也後徙今州

東四十里有軍都村亦曰故縣址

州境之山其名者曰銀山在州東北六十里石梯而上五里名中峰唐僧鄧隱峰之所居也山半有坪其色似鐵世稱銀山鐵坪云下有法華寺有隱峰十詩曰白銀峰曰佛頂峰曰古佛巖曰說法臺曰佛覺塔曰懿行塔曰雪堂曰雲堂曰茶亭曰濛泉金大定六年立石

曰駐蹕山在州西二十五里其山長而北袤凡二十里石皆辟立高可十餘丈其頂皆白山之南有棲雲岫臺高二丈許正北有石梯可上金章宗建亭於此舊傳山下有石牀石釜今亡

曰白浮山在州東南一十里有二龍潭潭上有龍神祠

曰湯山在州東南三十里有溫泉可浴水經注濕水又東溫泉水注之疑即此也

其水則出自居庸關爲濕餘河至舊縣之西而伏水經注云其水南流出關謂之下口潛伏十許里是也又南復出亦謂之榆河今涸元史燕鐵木兒與王禪軍遇於榆河北奮擊敗之追至紅橋北因據紅橋兩軍阻水而陣今州西南十二里有紅橋橋亾而名尚存文宗爲燕鐵木兒建生祠於橋南立碑紀功者也州西南三十里爲雙塔河東流過雙塔店入榆河出

州東神嶺山下爲神山泉出白浮山爲白浮泉元史  
至元二十八年都水監郭守敬奉詔興水利上自昌  
平縣白浮村引神山泉西折而南過雙塔榆河一畝  
玉泉諸水經甕山泊至西水門入都城南匯爲積水  
潭復東折而南出南水門東至通州高麗莊入白河  
長一百六十四里一百四步帝命丞相以下皆親操  
畚鍤首事於二十九年之春告成於三十年之秋賜  
名通惠河先是通州至大都陸運官糧歲若干萬石  
方秋霖雨驢畜死者不可勝計至是皆罷之以守敬  
兼提調通惠河漕運事築堰起白浮村至青龍橋長  
五十餘里以障諸水入於都城永樂初雨修之歲久

湮廢成化七年十月議開通惠河命戶部尚書楊鼎  
工部侍郎喬毅栢度言元人舊引昌平東南山白浮  
泉水往西逆流經過山陵恐於地理不宜及一畝泉  
水經過白洋口山溝雨水衝截俱難導引遂止不用  
其雙塔榆河之水今皆入于沙河

芹城在州東三十里有橋橋下有水出芹城北南流  
入於沙河水經注芹城水出北山南逕片城東南注  
濕餘水以此知沙河之爲古濕餘水也傳寫之訛或  
爲溫水後漢書王霸爲上谷太守陳委輸可從溫水  
漕以省陸運之勞事皆施行

榆河驛初設于榆河嘉靖中改附州城其未附也道

出州城之西南距州四十五里有唐家嶺店者亦車  
駕所駐也往者車駕北征徐行則次唐家嶺宣德九  
年九月癸未上巡邊駐蹕唐家嶺正統十四年七月  
甲午上親征駐蹕唐家嶺皆以明日至龍虎臺永樂  
十二年三月庚寅上親征次清河辛卯次沙河以三  
日至龍虎臺二十二年四月己酉上親征駐蹕唐家  
嶺以四日至居庸關其疾行則一日而至榆林榆林  
在岔道西二十五里永樂二十年三月戊寅上親征  
晚次榆林是也而英宗皇帝回鑾以景泰元年八月  
乙酉至居庸關丙戌自安定門入居南宮中朝迎候  
之禮但遣禮部左侍郎健懋至龍虎臺錦衣衛指揮

僉事宗鐸領驕馬至居庸關劉敬領丹陞駕至安定門內上自迎于東安門而已

州西四十里爲白羊口城二門距居庸南口二十里有水伏流元史白羊口千戶所于昌平縣東口置司景泰元年調涿鹿中衛後千戶所官軍守禦後以守備一人守之其西南有小城曰白羊新城

白羊北四十里爲長峪城二門其西有小城曰長峪新城

長峪北二十里爲橫嶺城二門守備一人守之

長峪西北二十里爲鎮邊城三門正德中建設守禦千戶所後以參將一人守之自鎮邊西南二十五里

至橫中山爲紫荆關轄沿河口界

州北八十里爲黃花鎮城三門元史黃花鎮千戶所  
於昌平縣東口置司者也以參將一人守備一人守  
之景泰中又設內官守備嘉靖四十年革黃花鎮城  
直天壽山之後爲長陟元武爲京師北門當居庸古  
北二關之中而北連四海治昔人所謂擁護山陵勢  
若肩背者也其水曰黃花鎮川河出塞外自二道關  
入口逕渤海所懷柔至順義界入白河其流九曲俗  
謂之九渡河城北有碧霞元君廟其設石有二松相  
去四五尺而上枝樛曲相穿遂合爲一名曰之松其  
地多鼠色如鼯昌毛淺初冬擬松實貯穴中爲岐洞

貯之多至二三十美好倍於人所收者土人每掘取之鼠失榛乃槁死樹上累累相望因并取而食之京師人以爲美味國史言洪熙元年閏七月守居庸關都督僉事沈清獻黃鼠上曰清受命守關當練士卒利器械而獻鼠何邪其郤之城西有垣一重曰頭道關再重曰二道關開之西撞道口堡鷄子峪堡西水峪堡堡西爲八達嶺

城東三十里爲渤海守禦千戶所城門距州一百里城北而西有擦石口堡磨石口堡驢鞍嶺堡大榛峪堡南冶口堡大長峪堡小長峪堡有鑛洞嘉靖三十六年封閉

又東五里爲蔡田峪城三門守備一人字之其東北有蔡田峪堡西有賈兒嶺堡田仙峪堡又東爲亓連口石塘路轄自此以西皆重邊自此以東皆單邊

昌平山水記卷上終

昌平山水記卷下

州東南九十里爲順義縣隋開皇中粟末靺鞨與高麗戰不勝厥稽部長突地稽率八部勝兵數千人自扶餘城西北舉落內附置順州以處之唐武德初改燕州會昌中改歸順州唐末仍爲順州統縣一曰懷柔貞觀六年置治五柳城改順義縣開元四年置松漠府彈汗州天寶元年改歸化縣乾元元年復名懷柔遼爲順州歸化軍金明昌六年改縣名曰溫陽元廢縣但爲順州洪武元年改順義縣然則今之順義昔之懷柔也城周六里一百一十一步四尺四門唐貞觀四年以突厥突利爲右衛大將軍封北平郡王

以其部落置順州都督府拜突利爲順州都督使帥其衆治營州南之五柳戍後唐周德威攻劉守光拔其順州蓋此地也元王暉言有唐大厯五年試太子洗馬鄭宣力撰開元寺碑今亾又言金節使剛忠王公守此州距大元兵死節按金史王晦字子明澤州高平人貞祐初中都戒嚴以戶部郎中募兵得萬餘人衛送通州粟入中都有功以部兵守順州通州圍急晦攻牛欄山以解通州之圍遷翰林侍讀學士及順州受兵晦誓死不去將士縋城出降被執不屈以死謂其愛將牛斗曰若能死乎曰斗蒙公見知安忍獨生并見殺贈榮祿大夫樞密副使命有司立碑歲

時致祭錄其子汝霖爲筆硯承奉而碑已不存今亦無知之者矣營州左屯衛本屬大寧永樂元年移於此領左右中前後五千戶所與縣同城而居城內四邊之中有白石幢下方上銳每方廣二丈高三尺又上重之八角各高二尺餘刻獅象海馬之形又上爲十二欄干爲千葉蓮座又上漸狹漸圓中石心一圓刻佛像千尊外石柱六各盤螭虎四距又上竹節小椀可三尺餘又上荷葉寶蓋二尺餘四門城樓僅與幢基址平遙望之層層如雲中麾幢也

縣北二十里爲牛欄山山上有洞俗言有金牛出焉至今洞前石壁爲小槽形名曰飲牛池也山北里許

有一小山昔有仙人騎牛來游因名靈跡山宋王曾  
卜契丹事曰順州至檀州漸入山牛欄當其要路也  
山之東麓潮白二河合焉有龍王廟山之東南爲潮  
河營有城二門把總一人守之

東北二十五里爲狐奴山水經注水不流曰奴蓋以  
山前瀦澤名也其北麓烏道而上里許漸濶漸平有  
寺寺後有小石城山下有龍潭今涸山西南百步有  
漢狐奴縣址後漢王梁傳太守彭寵以梁守狐奴令  
張堪傳拜漁陽太守於狐奴開稻田八千餘頃勸民  
耕種以致殷富鄧訓傳上谷太守任興欲誅赤沙烏  
桓烏桓怨恨謀反詔訓將黎陽營兵屯狐奴以防其

變卽此縣也魏文帝黃初二年省

西北三十里有石槽三曰東石槽南石槽北石槽元  
史上都兵入古北口其知樞密院事竹温台以兵掠  
石槽燕鐵木兒遣撒敦爲先驅以大軍繼其後至石  
槽敵軍方炊掩其不備直蹂之大軍并進追擊四十  
里至牛頭山餘兵奔竄夜遣撒敦襲之逐出古北口  
牛頭山蓋卽牛欄山也

西北三十五里爲桃山有五峰如桃花瓣巨石錯落  
橫亘數畝元上都兵進戰處也

几山陵大工所用白石黝堊皆取於順義西北諸山  
白河則源出塞外自石塘嶺西北入經密雲城下歷

懷柔順義界至靈跡山黃花鎮川河入之至牛欄山  
龍王廟潮河會之狀如燕尾金幹離不入順州郭藥  
師迎戰於白河敗績即此地也又南二十里過縣東  
門下至通州爲潞河東南至直沽入海嘉靖末總督  
侍郎劉壽以密雲兵將歲用糧米十五萬石悉繇通  
州陸運至牛欄山費多乃疏此河下達通州更駕小  
舟轉粟直抵密雲省費什七上聞賜金幣其後河流  
日盛用同知衛重鑑言自通州徑運至密雲  
溫榆河即昌平之榆河下流爲沙河入順義西南界  
下至通州入潞河順義謂之西河而金人名縣曰溫  
陽以此遼史作溫榆河本水經之濕餘河以字相似

而訛也

大水峪河源出塞外歷懷柔順義界至孫家莊東北合黃花鎮川河

縣境內泉源不一皆入于白河元至正十二年丞相脫脫言京畿近水地召募江南人耕種歲可收粟麥百萬餘石不煩海運京師足食從之於是西自西山南至保定河間北抵檀順東至遷民鎮凡官地及元管各處屯田悉從分司農司立法佃種合用工價牛具農器穀種給鈔五百萬錠命悟良哈台烏古孫良禎竝爲大司農卿又於江南召募能種水田及修築圍堰之人各一千名爲農師降空名添設職事敕牒

十二道募農夫一百名者授正九品二百名正八品三百名從七品就令管領所募之人農夫人給鈔十錠歲乃大稔此京東水田之利已行於元人者也然近京之地參錯不一有京衛屯地有陵衛屯地有外衛屯地有馬房地有良牧署地而縣西北板橋村有鈔沒太監曹吉祥地一十頃一十三畝天順八年十月奉旨撥爲宮中莊田皇莊之設自此始先是洪武中詔北平山東河南荒閒地土聽民開墾永不起科久之則有無藉之徒指爲空地投獻內官權要請爲莊業者小民失業無所控訴成化七年十二月彗出天田言者以爲天田畿內之田也宜罷莊田還之

百姓事寢不行

縣西南二十里有天柱村三十里有鞏溝村村東臨  
溫榆河渡渡南有長城遺蹟遼史順州南有齊長城  
城東北有華林天柱二莊遼建涼殿春賞花夏納涼  
者也齊長城天保中所築宋沈括曰幽州東北三十  
里有望京館東行少北十里餘出古長城又二十里  
至中頓又踰孫侯河行二十里至順州其北平斥土  
厚宜稼又東北行七十里至檀州即此遼史又言有  
曹王山曹操駐軍之地今不得其處而縣西三十里  
有燕王冢或曰水經注所謂濕餘河在燕王陵南者  
也有太子念頭而昌平東有燕丹村年祀緜邈罕能

究焉

後魏安樂郡故城在縣西北六里延和元年置交州  
太平真君二年罷州置郡領縣二土垠安市北齊廢  
土垠入安市後周廢安市入密雲縣隋開皇初郡廢  
今爲安樂莊永樂間撥給良牧署按水經注言濕餘  
水又東南流逕安樂故城西更始使謁者韓鴻北徇  
拜吳漢爲安樂令即此城也晉書地道記曰魏封劉  
禪爲安樂公國土垠縣有二一在縣北門外里許一  
在密雲縣東一百里陳宮山下又有唐南河縣故城  
在縣東南二十五里而軍都縣故城在縣西三十里  
蓋軍都之別徙者也

州東八十里爲懷柔縣洪武十三年分密雲昌平二縣地立焉城大民少宏治中乃截其東偏而築之故縣治在西門也城周四里六十步三門嘉靖末嘗設兵備僉事於此尋罷後以守備一人駐焉

縣東四十里爲黍谷山劉向別錄燕有黍谷地美而寒不生五穀鄒子居之吹律而溫氣至鄒子名衍燕昭王所師號談天行者也亦謂之寒谷吳越春秋北過寒谷是也山有風洞洞口風氣凜烈盛夏人不敢入後人遂名之鄒子祭風臺昔有廟今毀

東南三十里爲了髻山二峰高聳上有碧霞元君祠天啟七年巡按御史倪文煥請建太監魏忠賢生祠

干此賜名崇功祠未成而忠賢敗

北二十里爲紅螺山山下有潭相傳潭中有二紅螺大如斗出則光燄燭林今不見也遼史檀州有螺山

金史順州有螺山

西三里爲石塘山有大工則採石焉有工部廠

縣東七里爲白河又東十五里爲潮河

州東北一百二十里爲密雲縣漢白檀縣也三國志曹公歷白檀破烏丸於柙城後魏皇始二年置密雲郡治提攜城領密雲要陽白檀三縣北齊廢密雲郡反要陽白檀二縣入密雲縣隋開皇十八年以密雲燕樂二縣置檀州唐天寶元年改密雲郡乾元元年

復爲檀州遼爲檀州武威軍領密雲行唐一縣金以密雲縣屬順州元復爲檀州洪武初改密雲縣城周九里二百三十八步三門密雲中衛領左右中前四千戶所與縣同城而居有總督軍務兵部侍郎兼都察院副都御史一人整飭兵備山西按察司副使若僉事一人戶部郎中若員外若主事一人密雲左掖營密雲右掖營密雲中營密雲前營密雲後營振武營游擊各一人密雲城守備一人萬厯四年於城東復築一城周六里一百九十八步是曰新城兩端連之總督府居其中三門縣南至京師一百三十里而北以一垣爲界外接旃裘引弓之民故稱重地白河

偃城下善決而軍民錯居爲吏者難之昔唐顯慶中  
韋機爲檀州刺史邊州素無學校機敦勸生徒創立  
孔子廟圖七十二子及自古賢達皆爲之贊述今則  
師儒雖設絃誦之音無聞焉爾

縣南一十五里爲密雲山一名橫山郡所以名也石  
虎伐段遼遼棄令支奔密雲山遣使詐降而陰與慕容  
皝爲約皝遣臯子恪扶精騎七千於密雲山虎將  
麻秋率衆三萬迎遼爲恪所襲死者十六七

南二十里爲白檀山縣所以名也

南三十里爲隗山唐書密雲有隗山

東北八里爲冶山上有塔有石洞浹遼水四時不竭

東有牝洞昔人淘金址尚存

北四十里爲黑城川唐書檀州有鎮遠軍故黑城川也

昔蘇秦說燕文公以其北有棗栗之利謂之天府而今密雲多棗小而堅緻北人重之正統二年鎮守都指揮陳亨以占所部棗樹八百株被劾奪俸

自新城東北六十里爲石匣城城周四里二百六十四步三尺四門城西平地有石如匣深不可斷故以名其驛自會同館東北六十里爲順義驛七十里爲密雲驛六十里爲石匣驛先置在今城南一里許宣德四年密雲中衛奏爲河水所齧徙焉宏治十七年

築城隆慶三年設協守西路副總兵一人駐石匣六年設統領西路南兵游擊一人萬曆四年設石匣車營游擊一人

石匣之東南渡潮河十五里爲石盆峪有龍潭潭上石如盆形水懸崖而下入於潭潭外爲盆水從潭面歷盆抵峽而下數里入於潮河有龍宅焉其深無底潭中有石門水淺則見土人曰龍所從出入也上有廟距縣東北五十里

石匣西南十五里爲金溝村宋王曾上契丹事曰出燕京北門三十里至望京館五十里至順州七十里至檀州漸入山五十里至金溝館將至館川原平曠

謂之金溝淀自此入山詰曲登陟無復里候但以馬行計日約九十里至古北口今路不經金溝而金溝距縣止四十里也

石匣西二十里有燕樂縣故城後魏置此縣治白檀古城唐長壽二年徙治新興城即此縣也在漢爲虎奚縣地距今縣北五十里唐末劉守光出奔至此被擒元天歷初上都兵破古北口畱重兵屯燕樂城以輕騎進抵桃山燕鐵木兒掩擊於白狼河追至桃山降其衆燕樂聞之自潰白狼河在今順義西北三十里也

其見於史者漢有要陽縣魏有安州方城縣唐有威

武軍有三义城橫山城米城有大王北來保要鹿固赤城邀虜石子航七鎮有臨河黃崖二戍遼有行唐縣今靡得而詳焉

要水源出塞外自大小黃崖口入西流至密雲縣東入潮河俗謂之清水河縣曰要陽以此名

共城在縣東北五十里亦作龔城括地志云舜流共工幽州居此城在檀州燕樂縣界

唐檀州土貢人獲麝香而元史言檀州大峪錐山出鐵鑛至元十三年立四冶二十五年罷檀州淘金戶先朝亦嘗開採後封閉焉

自石匣東北征十里爲腰亭鋪始入山又十里爲新

開嶺又十里爲老王店金史貞祐二年潮河溢漂古  
北口鐵裹門關至老王谷者此也又十二里至古北  
口水淺則絕潮河水大則紆迴從山頂行故石匣至  
古北口計程爲六十里也宋沈括言自金溝館東北  
行乍原乍隰三十餘里至中頓過頓屈折北行峽中  
濟灤水通三十餘里鈎折投山隙以度契丹時道出  
其西故云然其曰灤水即今之潮河也古北口城在  
山上周四里三百一十步三門洪武十一年立守禦  
千戶所三十年改密雲後衛領左右中前後五千戶  
所其後以參將一人守之古北口自唐始名唐書檀  
州燕樂縣有東軍北口二守捉北口長城口也又北

八百望有吐護真河奚王牙帳也金史古北口國言曰雷幹嶺元史古北口千戶所於檀州北面東口置司唐莊宗之取幽州也遣劉光濬克古北口遼太祖之取山南也先下古北口金之滅遼希尹大破遼兵於古北口其取燕京也蒲覓敗宋兵於古北口元文宗之立也唐其勢屯古北口撒敦上都兵於古北口禿堅帖木兒之入也太子出光熙門東走古北口趨興松嘉靖二十九年俺答之犯京師也入古北口出古北口故中居庸山海而制其阨塞者古北喜峰二口焉永樂八年正月丙子塞古北口小關口及大關外門僅通一人一馬

城北門外有宋楊業祠業以雍熙中爲雲州觀察使契丹陷寰州遇於鴈門北陳家谷口力戰不支被擒不食三日死忠矣然鴈門之北口非古北口也祠於斯者誤也

又三里爲潮河川守禦千戶所有關元史中統二年十一月帝親將諸萬戶漢軍及武衛軍繇檀順州駐潮河川者也潮河自塞外興州發源入古北口西南經密雲懷柔至牛欄山與白河合其寬處可一二里昔人斫大樹倒著川中狹處僅二三丈以巨木爲柞其外縱橫布石以限戎馬此漢郎中侯應所謂木柴僵落谿谷水門者然水性湍急大雨則諸崖之水奔

騰而下漂木走石當歲歲修治又所云功費久遠不可勝計也川之兩旁築垣立臺東臺下有鐵門關爲出入道常扃鑰不開而臺上有樓總督大臣以撫賞泣焉開外爲夾牆撫夷魚貫而前受賞於關下軍士列兩山上伐鼓吹角以震讐之下有小城曰北關營二門而川口東南有小城曰潮河川堡亦二門守備一人守之

臺之東西因山爲城參差曲折千里不絕其衝處則建空心敵臺高或三四丈廣或十四五丈凡衝處或四五十步一臺緩處或二百步一臺每臺百總一人主殺敵臺頭副二人主輜重五臺一把總十臺一千

總皆以南兵克之每一二里鈴柝相聞爲一墩每墩軍五人主瞭望每路傳烽官一人有警舉烽左右分傳數百里皆見應速而備豫故鮮失火大抵皆戚少保繼光之遺畫也

其塞外重山縣亘數百里皆中國故地有小興州大興州宜興縣鳳州蘇武洞野馬川三角城猪頭山神樹等地小興州直古北口外九十里大興州直曹家寨東北距古北口可三日程本漢女祁縣地遼爲北安州興化軍興化縣金承安五年陞爲興州寧朔軍節度領縣二曰興化宜興元州縣與金同而書化爲安史家未之詳焉中統三年十二月割北京興州隸

開平府洪武二年六月命副將軍常遇春偏將軍李文忠率軍自三河出鹿兒嶺過會州敗元將江文清于錦川次全寧敗元丞相也速進攻大興州也速夜遁設伏大敗之自新開嶺進下開平三年三月甲午以永平府所屬宜興龍二州及懷來縣隸北平府七月辛卯以古北口山外雲州興州隸北平府四年罷山後諸州徙其民於山南及營建大寧立興州左右中前後五衛實居其地後之記載闕焉故從邊人之稱曰大興州小興州也永樂元年三月徙興州五衛左於玉田右於遷安中於良鄉前於豐潤後於三河而故城遂廢古北口有驛自口北出五十六里曰青

松又五十里曰古城又六十里曰灰嶺又五十里曰  
灤河又五十里曰黃屋又六十里曰哈八又五十里  
曰沈河又四十里曰東涼亭又五十里曰開平洪武  
二十七年六月乙酉置驛北平至開平中路七百六  
十五里十有四驛此路是也西路六百三十里十有  
三驛榆河居庸是也昔元世祖以燕爲大都開平府  
爲上都歲四月迤北草青駕幸上都避暑八月草枯  
則駕還大都歲以爲常車駕多出西路居庸而使臣  
之往來則古北口亦竝繇之元史中統三年閏月庚  
寅順州至開平置六驛此路是也四年四月宣德至  
開平置驛西路也五月戊子陞開平府爲上都丙申

立上都馬步驛都驛也上都以避暑故多涼亭有東涼亭西涼亭北涼亭文宗紀言賜東西涼亭諸軍士糧鈔趙世延傳言帝獵北涼亭而永樂二十年五月辛未上次西涼亭望其頽垣遺址樹木鬱然謂侍臣曰元氏創此將貽子孫爲不朽之圖豈計有今日哉書曰常厥德保厥位厥德匪常九有以亡况一亭乎可以爲殷監矣因下令禁軍士斬伐樹木獨所謂東涼亭者至今猶以驛名灰嶺灤河古城三驛竝屬興州右屯衛古城今移大喜峰口爲朶顏入貢道餘竝罷之

大寧者遼之中京大定府也漢爲新安平縣漢末步

奚居之幅員千里多大山深谷其後拓跋氏建牙於此當饒樂河水之南溫渝河水之北唐太宗伐高麗駐蹕於此部帥蘇支從征有功奚長可度率衆內附爲置饒樂都督府契丹太祖建國奚人舉族臣屬聖宗嘗過七金山土河之濱南望雲氣有郭郭樓閣之狀因議建都統和二十四年五帳院進奚王牙帳地二十五年城之實以漢戶號曰中京大定府宮掖樓閣府庫市肆廊廡擬神都之制有七金山馬盂山雙山松山土河宋王曾上契丹事曰自古北口度德勝嶺盤道數層俗名思鄉嶺八十里至新館過雕窠嶺偏槍嶺四十里至臥如來館過烏灤河東有灤州又

過黑

一作墨

斗嶺度雲嶺芹萊嶺七十里至柳河館河在

館旁西北有鐵冶又過松亭嶺甚險峻七十里至打  
造部落東南行五十里至牛山館八十里至鹿兒峽  
館過蝦蟆嶺九十里至鐵漿館過石子嶺自此漸出  
山七十里至富谷館八十里至通天館二十里至中  
京大定府城方圓纔四里許門但重屋無築闌之制  
南門曰朱夏門內通步廊多坊門又有市樓四曰天  
方大衢通闔望闕次至大同館其門正北曰陽德閭  
闔城西內西南隅岡上有寺城南有園圃宴射之所  
自過古北口居人草菴板屋耕種但無桑柘所種皆  
從壠上虞吹沙所壅山中長松鬱然溪谷中時見畜

牧牛馬橐駝多青鹽黃不金海陵貞元元年更爲北  
京元世祖至元七年改爲大寧路自洪武初徙民山  
南之後其地常爲敵騎往來而元將納哈出尚據金  
山二十年三月命大將軍宋國公馮勝等率師出松  
亭關築大寧寬河會州富峪四城勝遂率兵趨金山  
六月納哈出降九月癸未置大寧都指揮使司大寧  
中左右三衛及會州木榆新城等衛悉隸之二十一  
年改大寧都指揮使司爲北平行都指揮使司置大  
寧前後二衛二十二年正月壬午會寧侯張溫北平  
行都指揮使司都指揮使周興奏大寧城周三千六  
十丈五門會州城周一千一百一十八丈四門富峪

城周九百丈四門寬河城周八百一十二丈四門各有濠其長濠各有丈尺創蓋倉廩五百五十間營房七千五百三十三間六月庚子朔置富峪寬河二守禦千戶所二十四年四月辛未封皇子權爲寧王二十五年八月庚申置營州後屯衛二十六年二月壬辰置營州中前左右四屯衛二十八年四月甲申改大寧左右二衛爲營州左右二護衛大寧距北平布政司八百里自齊化門而東歷潞河夏店公樂漁陽石門遵化六驛共三百一十里自遵化而北七十里灤陽驛又五十里富民驛又六十里寬河城又六十里柏山驛又六十里會州城又六十里季莊驛又六

十里富峪城又七十里大寧城而大寧東至廣寧西  
至開平亦各有驛驛設馬五十匹其屯田子粒則二  
十三年十一月北平行都司奏大寧左等七衛及寬  
河千戶所今年所收穀麥凡八十四萬五百七十餘  
石而三十年四月乙酉敕諭燕王今年屯種自東勝  
至開平開平至大寧廣寧須於五月一報禾苗長養  
何如七月再報結實何如十月又報所收子粒若干  
一歲三報使朕得知邊計而屯軍亦不敢怠偷又每  
衛並置儒學頒經書以廣文教聖祖之垂意邊方可  
謂至矣建文元年九月燕王兵出劉家口襲破大寧  
下富峪寬河會州等城以寧王及將士歸北平大寧

初設未有人民但立北平行都指揮使司及大寧營  
州興州會州等一十六衛自燕府拔之而南遂爲空  
城及轉戰三年始下南京而大寧已棄之後不能復  
置因徙衛於山南而以其地畀兀良哈然實錄言永  
樂元年十一月命武安侯鄭亨於千戶寨灰嶺慶州  
神樹西馬山七渡河皆設煙墩候望警息新昌伯唐  
雲領軍自小興州大興州東接牛嶺會州塔山龍山  
諸處屯種北勿出會州西勿出千戶寨又言十九年  
十一月命邊將置邏騎營於古北口之北神樹之地  
而宣德三年八月丁未車駕東巡九月辛亥至石門  
驛喜峰口守將奏兀良哈衆萬餘入寇將及寬河壬

子上駐蹕遵化選士三千人從乙卯車駕出喜峰口疾馳四十里昧爽至寬河擊敗兀良哈之衆丙辰次冷嶺丁巳至會州壬戌車駕發會州次鐵將軍店甲子詔班師是日駐蹕擺山站乙丑次偏嶺丙寅車駕入喜峰口是則成宣之世此地尚爲甌脫云近年採木者嘗至其處言城池舊蹟宛然在也

兀良哈者地在潢水之北大寧邊外洪武二十二年五月辛卯詔立泰寧福餘朵顏三衛敕元故遼王阿札失里等曰覆載之間生民之衆天必擇君以主之天之道福善禍淫始古至今無有僭差人君能上奉天道勤政不二則福祚無期若怠政殃民天必改擇

焉昔者二百年前華夷異統勢分南北柰何宋君失  
政金主不仁天擇元君起於草野戡定朔方撫有中  
夏混一南北逮其後嗣不君於是天更元運以付於  
朕自即位來今二十餘年爾阿札失里等知天命有  
歸率衆來附朕甚嘉焉朕每於故元來歸臣民悉加  
優待况爾元之親屬者乎今特於泰寧等處立泰寧  
福餘朶顏三衛以阿札失里爲泰寧衛指揮使塔賓  
帖木兒爲指揮同知海撒男荅奚爲福餘衛指揮同  
知脫魯忽察兒爲朶顏衛指揮同知各領所部以安  
畜牧自古蕃人無城郭不屋居行則車爲室止則羶  
爲廬順水草便騎射爲業今一從本俗俾遂其性爾

其安之永樂元年十一月辛卯敕諭兀良哈部落曰  
朕承天眷君臨天下嘗遣使齎詔諭爾爾等聞命即  
遣人來朝其誠可嘉今仍舊制設泰寧福餘朶顏三  
衛俾爾等統屬軍民鎮守邊境舊嘗設官者列名以  
聞咸復之若頭目人等前未授官今當授者亦第其  
名來聞朕即授之俾世居本土安其生業已而三衛  
諸夷益求內附畀以大寧故衛地使爲外藩自古北  
口至山海關外爲朶顏自廣寧前屯衛至廣寧白雲  
山外爲泰寧自白雲山至開原外爲福餘歲許聖節  
正旦兩貢每貢百人繇喜峰口入或曰靖難兵之起  
三衛夷人從戰有功故畀之國史不書莫可考焉尋

叛附阿魯台二十年七月上親征阿魯台還討之大  
敗其衆於屈烈兒河斬馘無算宣德三年九月上出  
獵巡邊駐蹕遵化適其衆萬餘入寇上以鐵騎三千  
逆擊大破之獲首數千級正統九年七月兀良哈入  
寇發兵二十萬分四道成國公朱勇出喜峯口左都  
督馬諒出界嶺口興安伯徐亨出劉家口左都督陳  
懷出古北口逾灤江渡柵河經大小興州過神樹破  
福餘于全寧又破泰寧朶顏于虎頭山鹵獲男婦以  
千計馬牛羊以萬計自是三衛雖衰而怨中國益深  
因通也先爲鄉導入寇後復謝罪入貢國家亦撫納  
而小小爲寇鈔不絕正德十年朶顏入馬蘭峪殺參

洪武十五年九月丁卯北平都司言邊衛之設所以  
限隔內外宜謹烽火遠斥候控守要害然後可以警  
服寇敵撫輯邊氓因上所轄關隘自一片石至金水  
口凡二百處請以各衛卒戍守其地詔從之太祖實  
錄凡三修其於大寧外邊事皆略而弗詳儒臣之淺  
也於內邊則具書之矣薊鎮三協之名始自嘉靖未  
年以四路爲一協石塘古北口曹家寨牆子嶺爲西  
協馬蘭峪松棚喜峰口太平寨爲中協建昌營燕河  
營石門子口山海關爲東協而各路將之廢置不常  
今據崇禎二年文案錄之

昌平山水記卷下終